

obeliscus scilicet cum hedera circumplicata, & inscriptione, *Te stante virobo*. Adservari fertur in hac aede ex D. Nicolai, Myræ Episcopi, (quæ urbs erat Lyciæ) ex eadem Lycia oriundi, manu articulus unus, inclusus auro, gemmis multis interfecto: unde huius loci primum nata religio, qui advenarum frequentia in eam excrevit amplitudinem, ut jam non pagum, sed urbem, & quidem totius Lotharingiæ cultissimam, quis possit dicere, si muro clauderetur. Ea est ædificiorum venustate, apta viarum dispositione, incolarum multitudine, ut nihil requiri queat: sed ob mercaturam præcipuè & omnis generis opificia commendatur, mercatores habens perquam opulentos, vicinis suis ditiores. Vno milliari Nancejo distat *Fruart*: tribus, *Ormes*: paulo amplius, *Bayon* & *Luneville*: quatuor *Le Pont à Mouson* & *Gerbeviller*; quinque *Charmes*; sex *Chasteno*, *Morhanges* & *Vaucoleur*; paulo plus, *Maxen sous Bresse*: septem, *Dompair*, *Deneure*, *Hodon Chateau*; octo, *Ramberville*, *Roan*, *Bellemont*, *Neuf-Chateau*, *Mugstat*, *Marchainville*; novem, *Espinal*, *Bruyeres*, *Darney*; decem, *Ormont*, *Walderfing*, *Beaurains*; tredecim, *Vaigny*; quatuordecim, *L'Esfraye*.

Comitatus.

Comitatus titulo & dignitate clarent, quæ vernacule *Vaudemont*, quinque Nancejo milliariibus. *Chaligny* ad dextram Mosellæ, leuca semi Nancejo. *Amance* septem milliariibus à Mediomaticum urbe versus Meridiem, *Almentia* Latine scribentibus, scrinium olim & antiqua Lotharingiæ Cancellaria, testantibus Archivis à Rosiero prolatis. *Richcourt* haud procul lacu, qui vulgo *La Garde Lac*, unde annis profluit, qui inter Fanum S. Nicolai & oppidum Rosieres Murte miscetur. *Remiremont* ad sinistram Mosellæ, insulam ibi facientis, in Lotharingiæ meridionalissimis. *Rumaricum*, Castellum habet hic Aimoinus Monachus. Spectantur haud procul inde valles, quæ vulgo *L'Esfraye* & *Vagny*. *La Mothe* ad amnem situm est, qui mox in Mosam se exonerat. Visitur ibi territorium, cui nomen *Le Sanctoy*. Sunt & Comitatus quidam Imperii, *Salmensis*, *Kirkinganus*, & *Blanckenburgius*, Gallis *Blancmont*. quo loci spectatur castrum vetus, spaciosum & magnificum, cui palatium novum Ducis, venusta structura insignis, est conjunctum. Incolæ agriculturæ dant operam.

Baronatus.

Nomenii Baronatus est ad dextram Sellæ fluvii, tribus milliariibus ab urbe Mediomaticum meridiem versus.

Dominia.

Dominia sunt: *Marsal* ad Sellæ sinistram, haud procul lacu Lindero, in quo insula cum oppido *Teichenful*, *Remereville* tribus Nancejo milliariibus, *S. Bellemont* totidem remota. *Rambertville* ad dextram Mortanæ, haud procul fonte, ubi silva Mortanensis. *Rosieres* ad Murtham, prope Fanum D. Nicolai, duobus Nancejo milliariibus.

Gallia.

*Homburg* grandiore leuca ab oppido *Sarbruck*, ad amnem, qui mox Saravo concurrat. *Mariemont* à monte, cui impositum, uno à Lindero lacu milliari, meridiem versus. *Sandacourt* medio fere itinere inter Vaudimontem & Motham, in agro, qui vulgo *Sanctoy*.

Mediomaticum urbem, vulgo *Metz*, antiquis Divodurum Mediomaticum appellatum, olim Imperialem, in suam potestatem redegit Galliarum Rex Henricus II. Præsidet urbis senatui missus à Rege magistratus. Tribunal autem Mediomatici urbis tres habet Episcopatus, sub metropoli Treverensi, *Metensem*, *Tullensem*, *Virdunensem*, sic à locis nuncupatos, in quibus suæ singulis sedes. Haud procul Metis, prope pagum *Iovii*, in Mosella antiqui aquæductus sunt vestigia. De iis sic Divæus in Itinerario: In hoc itinere pagus est Iovii dictus, inter montium radices & Mosellam, ubi quantacunque est inter montes utrosque, qui ripas ambiunt, distantia, aquæductum antiquitus fuisse, indicant ejusdem, quæ adhuc exstant, reliquiæ. Arcuum adhuc restant multi, suntque ex albo lapide, in laterum formam dissecto; & nonnulli quoque ejusdem operis in adversa ripa cernuntur. Incolæ asserbant, in eodem loco fontem hodieque esse, quamvis hos arcus (solita inscitia) ponti inferuisse putantes, & ab hoc pago in montis ipsius jugo minores alios arcus fuisse dicebant, qui versus urbem Metensem, quæ uno hinc distat milliari, excurrere viderentur. Altitudo juxta ripam pedum est circiter LX, unde conjicere est, quanta totius operis moles fuerit, quantaque altitudo arcuum, qui in ipso erant fluminis alveo, quorum hodie nihil superest. Referebant iidem incolæ, superiorem arcuum partem planam omnino esse, cæmento rubei coloris indutam; & in ejus medio domunculam non ita multis abhinc annis adhuc fuisse, ab utraque parte patentem, quam nos partem recti fuisse, quæ tubum tegeret, suspicabamur. *Tullensis* à Tullo, vernacule *Toul*, nomen habet. *Virdunensis* à Virduno, vulgo *Verdun*. Leguntur autem tres urbes, quas commemoravi, Comitatus etiam titulo & dignitate insignes.

Cum Lotharingia porro solet explicari territorium *Barrense*, vulgo *Le Barrois*, quod se extendit ad Novum usque Castellum, *Neuf-Chastel*. Metropolis illi *Bar le Duc*, sic dicta ad discrimen aliarum, quæ *Bar sur Seyne*, & *Bar sur Aulbe*. Minorum gentium oppida sunt, *La Motte*, *Ligny*, *Arq*, aliaque. Ad Mosam se offerunt *Commercy* & *Vaucoleur*, quæ partim Franciæ, partim Barri.

De Lotharingiæ Ducum Stemmatis, rebusque gestis, volumen satis magnum edidit Franciscus Roseus.

O

METIS